

Ner Cart Co' Mque' Pedr Ye's Loo Mèn

**Pedr mque' ye's loo mèn co' ngola'sle'
loo cón che'n Diox por cón che'n
Jesucrist, mèn co' mque tee re's pál.**

1 Daa, Pedr, nac thib mbi' co' ndxe' di's cón che'n Jesucrist loo mèn, co' nee di's, leque yub Jesucrist mtel' daa loo mèn. Ngue que'en ye's ndxè' loo rye gu', gu' co' ngola'sle' loo Jesús no loo cón che'n Jesús, gu' co' ngro' nacionpe' gu', gu' co' nzo ban yèezya' che'n làaz mèn ponto, gu' co' nzo ban yèezya' che'n làaz mèn galacia, gu' co' nzo ban yèezya' che'n làaz mèn capadocia, gu' co' nzo ban yèezya' che'n làaz mèn asia, no gu' co' nzo ban yèezya' che'n làaz mèn bitiiñ. ²Diox xud na' mcui gu' xalque' mnibe' Diox loo lezo' Diox li Diox xal nac co' gunee lezo' Diox li Diox axta más pólle'a. Por cón che'n Xpii Natú' che'n Diox, Diox mblo' xà' gu' loo ryethe con' ye'rsin' co' nac cón che'n xab izlyo' par ante tyubdi's gu' loo Diox no par gac gu' mèn nali no mèn nambii loo Diox por cón che'n renpe' Jesucrist. Ndlyazen le' Diox li anggac huax con' ndac loo gu'. No ndlyazen yo nagàl lezo' gu' loo Diox no cue ban gu' rye nda gu' no rye ndye'th gu' làth xtàa gu'.

**Yalnaban cub ndxè' nac thib
yalnaban co' ngure quee lezo'
mèn gac loo mèn póla.**

³Ndlyazen gab na' le' Diox co' nac xud Tad Jesucrist na' nac Diox roo no

Diox xèn. Por anze'f mblyat lezo' Diox gunèe Diox na', mbli Diox ngóc na' mèn co' ngue no tedib yalnaban cub xal co'se' ndxàca loo thib mbeto' co' ndxáal loo izlyo'. Tataa ngóc loo na' por mbli Diox le' Jesucrist ngro xban làth mèn nguth. No por ngro xban Jesucrist làth mèn nguth, ndxàca loo na' le' na' nzi quee lezo' gac loo na' tedib yalnaban co' gac thib yalnaban más ndac yiloo. ⁴No li Diox le' gu' gac che'n no yan' no gu' con' co' nac xal thib herens co' ngue quenap Diox loo bé' co' gac che'npe' gu' yiloo. No con' co' gac che'n gu'a no con' co' yan' no gu'a ne'lyuxte thidtene. No ne' ne' yen mod gac con'a con' zab. No ne' ne' yen mod gac con'a xal con' ngol' xal ndxol' chol laa nayèe co' ngol'. ⁵No com le' gu' ndxela'sque' loo Diox, ¿lé'?, Diox nquenap gu' por cón che'n con' roo no con' xèn co' ndxàp Diox la's nii Diox no la's ya' Diox axta co'se' gac huiz yòo gu' loo bé' par ban no gu' Diox thidtene tya. No lu' Diox con' co' yan' no gu' no co' gac che'npe' gu' le'n huiz co' gac lult tiemp loo izlyo' ndxè'.

⁶No por cón che'n ryethe con'a, nden'en no naneen ndyac lezo' gu' mastale' nquin gac huax yaltii loo gu' no ten' gu' huax yaltii ndxep tiemp. ⁷Axta arid ntaca loo Diox le' gu' ndxela's loo Diox no ndxàp gu' yalxla's loo Diox. Diox non nquin gac loo gu' tyactii gu' par ñee Diox ñeene' ché' xec gu' que tee ban gu' loo cón che'n Diox. Co'se' ndxàc con'a loo gu', naca

xal co'se' nsun' mèn or con quì par ta' mèn cuent ñeene' ché' nac ora orpe'. Co'se' nxec mèn ndxàc chol yaltii co' ndxàc loo mèn, le' sya, cón che'n mèn axta arid ntac loo Diox más leque or co' ndxeza' no co' ndlyux. Por cona, ngue niin loo gu': Chele' gu', licque', tolo gáp yalxla's loo Diox no tolo yila's gu' loo Diox láth ndxàc chol yaltii loo gu', syase co Diox cuent nac gu' mèn ndac. No li Diox gác con' roo no con' xèn loo gu'. No li Diox gác gu' mèn guryath no mèn guryèn loo taamas mèn co'se' yì'th Jesucrist loo izlyo' ndxè' tedib vez.

⁸Nonquen le' gu' anze'f nque' lezo' Jesucrist mastale' tarte ñèe gu' xá ñaa Jesucrist. No por ndxàp gu' yalxla's loo Jesucrist, mastale' tarte ñèe gu' xá ñaa Jesucrist, ndyac tín' lezo' gu' no thidtene nxo'f nde' nxo'f ndla' lezo' gu'. No por anze'f ndyac lezo' gu'a, nonquen naca thìb con' roo no thìb con' xèn loo gu' no axta ne' ne' gác gu' ta' gu' cuent co' ndxàc loo gu' loo cón che'n Jesucrist loo mèn. ⁹No por mbli gu' no mxec yèe gu' ngola's gu' loo cón che'n Jesucrist, mblyá' alm gu' no xpìi gu' loo ryethe con' ryes tac ngola's gu' loo Jesucrist par mblyá' gu' loo ryethe con' ryes.

¹⁰No axta más póla mèn co' mde'th dí's co' ndxab Diox huen huen mbral no mdub rez mèn loo libr co' nac xti's Diox co' nac testament gox no mdoodi's mèn cón che'n xá mod lyá' mèn loo ryethe con' ryes. No con'a nac con' ndac co' mbli nèe Diox angli Diox loo gu' le'n tiemp ndxè'. ¹¹Leque yub Xpii che'n Crist co' nac Xpii Natú' mbli par ngro xo'f loo mèn co' mde'th dí's. No mda' mèn axta con' co' tyactii Crist no xá mod gác ryethe con' roo no ryethe con' xèn loo Crist co' gác loo Crist yiloo. Mèn mblyá's ngo xo'f chó nac mbi' co' gác Crist no pól gác tiemp co'se' yì'th Crist loo izlyo' ndxè' xal mblo xo'f Xpii Natú'i loo mèn, Xpii

Natú' co' ngo no mèn. ¹²Per leque yub Diox mbli ngro xo'f cón che'n con' co' mbli mèn axtuuz no con' co' mdoodi's mèn inacte con'a con' co' gác loo leque yub mèn. Ndxè'leque', Diox mbli' loo mèn le' cón che'n con'a nac co' ndxàc loo na' nalle'. No nalle' leque cón che'n con' co' mbli mèn axtuuz pólle'a nac leque con' co' ndxath no co' ndxèn loo gu'. No ndxath no ndxèn con' ndxè' loo gu' por cón che'n mèn co' ngo yalbàn cón che'n xá mod lyá' mèn loo con' ryes. Ngo mèn yalbàn por cón che'n con' roo no con' xèn co' ndli Xpii Natú' loo na'. Xpii Natú' co' mtel' Diox co' ngro' loo bé' loo na'. No leque cón che'n con' ndxè' nac con' co' mbli angl axtuuz par ñee angl no ta' angl cuent cón con'a no xá mod gác con'a.

Diox mblec na' no mcui Diox na' par ryo xá' na' loo ryethe con' ye'rsin' co' nac cón che'n xab izlyo' par que tee ban ndac na' loo Diox.

¹³Cona, ndlyazen huen huen li gu' axtuuz cón che'n con' co' ndli gu'. No ndlyazen nabe'ste que tee ban gu' no ne'zi'fte gu' arid con' ye'rsin' la's nii gu' no la's ya' gu' ned nzi tee gu'. Ante bli gu' axtuuz loo ryethe con' ndac co' li Diox loo gu' no co' ta' Diox loo gu' co' nzi quee lezo' gu' gác loo gu' co'se' yú' loo Jesucrist loo mèn loo izlyo' ndxè' tedib vez. ¹⁴Fque tee ban gu' làth xtàa gu' xal myen' bix co' ndyubdi'sque' loo xud myen'. Ne'que tee bante gu' xal ngòc yalnaban co' mque tee ban gu' póla ndoore' co'se' tarte ta' gu' cuent cón che'n Diox no co'se' tarte libe' gu' Diox por cón che'n Jesucrist. ¹⁵Ndxè'leque', fque tee banque' gu' loo cón che'n Diox xal mèn co' thidteneque' ngro xà' loo ryethe con' ye'rsin' co' nac cón che'n xab izlyo'. Tataa mod bli gu' tac Diox co' mblec gu' no Diox co' mcui gu' par ngòo gu' loo cón che'n Diox, Diox nac thìb Diox nalì no thìb Diox

nambii no thib Diox natú'. ¹⁶Loo libr co' nac xti's Diox ndub di's co' mbez taandxè':

Gòc gu' mèn co' ngro xà'que' loo ryethe con' ye'rsin' co' nac cón che'n xab izlyo' tac daa nac thib Diox nali no thib Diox nambii no thib Diox natú'.

¹⁷Yende chó mèn nzo co' más ndyu' loo Diox leque taamas mèn. Chele' gu' mbez: —Pay— loo Diox, Diox co' ndla's loo thib thib mèn xá mod nzi tee ban mèn par tub rez Diox cón che'n mèn yiloo, ndxàal zye'b gu' ñèe gu' Diox le'n ryethe huiz co' naban gu'. ¹⁸Diox mbli par mblyá' gu' loo thib yalnaban co' yende cón ntac co' ngòc thib yalnaban co' mque tee ban gu' póla, co' ngòc co' mté'th gu' loo xudgool gu'. No gu' nda'que' cuent co' huenleque' le' co'se' mtelá' Diox gu' loo con' ryes por mdyon' xtol gu' co' angngòc loo gu' nalle', cón che'n con' co' angmbli Diox loo gu' ne'ndi'de gu' con'a por cón che'n con' co' ndlyux no con' co' ndxeza' xal ndxeza' or no plat. ¹⁹Ndxè'leque', mtelá' Diox gu' loo con' ryes por cón che'n ren che'n ladpe' Crist, ren co' anze'f ntac loo Diox. Leque yub Crist mda' yalnaban Crist loo yalguth por cón che'n xtol mèn xal co'se' ndxuth mèn thib mbacxil' yen' co' be' nac thib mbacxil' nambii no co' tarte gác nec thib con' zab no nec thib yalquii loo par guth mèn mbacxil'a par xo mèn rena loo Diox loo izlyo'. ²⁰Diox mdoocrist no mnibe' Diox loo Crist par gác con' co' ngòc'le' loo Crist. Tataa mbli Diox loo Crist ndoore' cuéc Diox no mxèn' Diox izlyo'. Per ne'ngàcte con'a loo Crist póla. Ndxè'leque', ngòca loo Crist le'n lult tiemp co' nac tiemp ndxè' ale mbyú' Crist loo mèn no mbi'th Crist loo mèn loo izlyo' ndxè' par ngòc con' ndac loo gu' nalle'. ²¹No por cón che'n Crist gu' ngola'sque' loo Diox, Diox co' mblo xban Crist làth mèn nguth. No

mbli Diox ngòc con' guryath no con' guryèn loo Crist. No por cón che'n con' co' mbli Diox loo Crist, thidtene mbli nèe gu' gu' le' gu' ndxela'sque' no nzi queeque' lezo' gu' loo cón che'n Diox. ²²No nalle' por mdubdi'sque' gu' loo di's ndac co' mbìn gu' co' nac licpe' cón che'n Diox xalque' mblyath no Xpii Natú' gu' par mbìn gu' di's cón che'n di's ndaca, mbli gu' par ngòc gu' mèn nali no mèn nambii loo Diox par tataa mod, licque', nque' lezo' gu' ñèe gu' hues xtàa gu' co' ngòc loo cón che'n Diox. No ndxàal tataaque' tolo que' lezo' gu' ñèe gu' thib xtàa gu' no tedib xtàa gu' dib nzo yéc gu' no dib nzo lezo' gu'. ²³Xalque' niin loo gu', gu' ngòc'le' mèn cub xal thib mbeto' co' ndxáal loo izlyo'. Per ne'ngàcte con' ndxè' loo gu' xal co'se' ndxáal mèn por ren che'n xud mèn no ren che'n xna' mèn co' ndxath no co' ndlyux. Ndxè'leque', ngòca loo gu' ante por cón che'n xti's Diox. Nè nac di's che'n xti's Diox tac ndli xti's Diox nden' mèn di's xá nac mod co' nque tee ban mèn co'se' ndlab mèn xti's Diox o co'se' ndxon' mèn xti's Diox. ²⁴Tac loo libr co' nac xti's Diox ndub di's co' mbez taandxè':

Rye bin mèn co' naban loo izlyo' ndxè' nac xal huan nayèe. No ryethe con' roo no con' xèn co' mbez mèn nac mèn no co' ndli mèn nac xal nac ye' huan co' nxec thib huiz no thib ze no maste. Huana mbiiz. Le' ye' co' nxyo'f loo huana ndxàb loo izlyo'.

²⁵Per ndxè'leque', di's co' nac xti's Tad Diox thidteneque' nzo. Ne'lyuxte xti's Diox. Tyubque' di'sa xal mbez di's loo libr co' nac xti's Diox. Pues di's co' nac xti's Diox ndxè' nac di's co' ngo mèn yalbàn loo gu' co' ndlu' xá mod lyá' mèn loo con' ryes.

2 Por cona, ngue niin loo gu': Blá' gu' ryethe con' co' nac con' ye'rsin' thib lad, co' nac ryethe mod co' nquedi mèn xtàa mèn, no co' nac mod

co' ntembii mèn ro mèn no ntembii mèn xti's mèn loo xtàa mèn, no co' nac mod co' ndxàn lezo' mèn nìe mèn xtàa mèn, no co' nac ryethe mod co' nda' mèn cuentyix loo xtàa mèn, no co' nac mod co' nteri'th mèn cuentyix loo xtàa mèn. ²Neeque' gu' xal ndxàca loo myen' bix co' diz ngóol co' ndxàaz niiz co' nac xiiz xna' myen', ìlé'? Lomisque', cua'n gu' mod loo cón che'n xti's Diox par tolo té'th gu' no ta' gu' cuent cón che'n Diox no tyubdi's gu' loo Diox por cón che'n xti's Diox xalque' ndryoo no nxyèn myen' bix co' ndàaz xiiz xna'. Chele' gu' tataa li, le' sya, tataa mod tolo té'th gu' no ta' gu' cuent loo cón che'n Diox par tyubdi'sque' gu' loo Diox no, licque', lyá' gu' loo con' ryes thidtene. ³Tataa gâcpe'i loo gu' chele' gu', licque', mbli la's le' Tad Crist nac thib Tad ndac.

Trè' ndlu' le' Crist co' naban thidtene nac xal thib quèe co' yub ngóol co' yende chó cuin.

⁴Cona, niin loo gu': Ftolo gòc gu' mèn nado'. Ftolo té'th gu' no fta' gu' cuent no ftubdi's gu' cón che'n Tad Crist co' thidtene naban. Tad Crist nac loo Diox xal thib quèe co' ndli mèn us par gâc quèea quèe scuadr che'n liz mèn. Mèn mtè'b Tad Crist no mchobla' mèn Tad Crist. Per loo Diox axta arid ntac Crist. Por cona, mcui Diox Tad Crist par gâc Tad Crist xal thib quèe scuadr co' tyub squin yòo, co' nee di's, nac thib con' co' naban co' ngue toxcua' Diox. ⁵Gu', ne, nac xal quèe co' nxo'f o co' ndub albañil loo quèe scuadr co' nac quèe cimient. Fta' gu' lugar loo Diox par li zin' Diox gu' par thidte gâc gu' loo Diox, co' nee di's, nac xal thib templ co'te' nzo ban Diox. No fta' gu' lugar loo Diox li zin' Diox gu' par gâc ryete gu' co' ndxela's loo Jesucrist xal nguley' co' ngro xà' loo ryethe con' ye'rsin' co' nac xab izlyo' par ante li gu' sirv loo Diox.

No ante por cón che'n Jesucrist ngue li gu' con' co' nac con' ndac no co' nac con' co' yòo lezo' Diox. ⁶Por cona, ndub di's loo libr co' nac xti's Diox co' mbez taandxè', ne:

Daa mdoo thib mbi' loo mèn ciuda Jerusalén. Mbi'a nac xal ner quèe co' mxen albañil co' mdub albañil squin yòo liz mèn. Mcuin mbi'a xal thib quèea. No anze'f ntac mbi'a par daa. Le' mèn co' yila's loo mbi'a na, mèn na'tyoo xà'de lezo' no ne'yitacte lezo' mèn loo cón chenen por cón che'n mbi'a. ⁷Por part cón che'n gu' co' ndxela'sle' loo Diox por cón che'n mbi' co' nac Crist co' nac xal quèe squadr, arid ntac Crist co' nac xal quèea loo gu', ne. Per part cón che'n mèn co' ne'tyalte yila's loo Crist, loo mèn tyaaque' di's no tyubque' di's co' ndub loo libr co' nac xti's Diox co' mbez taandxè':

Le' quèe co' mtè'b mèn co' nac xal maistr albañil, quèea ngòc ner quèe scuadr co' ndyub squin yòo. ⁸Lomisque', tyaaque' di's no tyubque' di'sa no gâcque' di's xal mbez di's ndxè', ne: Crist ngòc xal thib quèe co' ndxezi'f no co' ndxega's nii mèn, co' nee di's, co'se' nque quèe nii mèn no axta ndxexud mèn loo quèea.

Pues part cón che'n mèn, mèn ngozi'fque' no ngoga'sque' mèn loo cón che'n Crist co' nac xal quèea por ne'nglide mèn cas no ne'ndub nzade mèn di's co' ndlu' cón che'n Crist. Tac Diox mnibe' lezo' no mdoo lezo' Diox le' ryete mèn co' ne'lide cas no co' ne'ndub nzade loo di's co' ndlu' cón che'n Jesucrist, mèn ryo xà' loo mod co' mnibe' Diox loo mèn par li mèn par yòo ban no mèn Diox loo bé'. No tataa mod tyactii mèn yiloo par con' mbli mèn.

Trè' ndlu' cón che'n mèn co' nzo loo cón che'n Diox no co' nac che'npe' Diox.

⁹Per part cón che'n gu' co' ngola'sle' loo Crist, gu' nac thib bin mèn co' mcui

Diox par gac gu' che'npe' Diox. No nac gu' thib ned mèn co' nac xal nguley' co' ante li sirv loo Diox co' ñibe'pe' loo ryethe con'. No nac gu' loo Diox xal thib naciòn mèn co' ngro xà' loo ryethe con' ye'rsin' co' nac xab izlyo' par ante li gu' sirv loo Diox. No nac gu' mèn co' nac che'npe' Diox. Tataa mbli Diox ngòca loo gu' par ya te'th gu' no lu' gu' loo mèn cón che'n zin' roo no zin' xèn co' mbli Diox loo mèn. Yub Diox mblec gu' no mcui Diox gu' par ryo' gu' loo ryethe con' co' ndli ntecuau yéc mèn no co' ndli ntecuau lezo' mèn loo cón che'n Diox. Tataa mbli Diox par mdyub xnii yéc gu' no par mdyub xnii lezo' gu' loo cón che'n Diox co' nac thib con' roo no thib con' xèn cón che'n Diox par non gu' no ta' gu' cuent cón che'n Diox. ¹⁰Gu' thidteneque' ne'ngàcte mèn co' ngòc mèn nacionpe' Diox ndoore' yila's gu' loo Crist. Per nalle', nac gu' mèn che'npe' Diox. Thib cua'a yende chó nglat lezo' gunèe gu'. Per nalle' Diox ndlyatque' lezo' ñèe Diox gu'.

**Guree ban gu' ante par
li gu' sirv loo Diox.**

¹¹Gu' co' nac mèn huesen por cón che'n Crist, gu' co' anze'f nque' lezon ñèen, ña'ben loo gu' xal loo mèn tith co' ngro' liz no co' ngro' làaz, co' nzi tee tith co'te' nac liz no co'te' nac làaz, ne'ta'de gu' lugar tyub chol yo'f ye'rsin' co' ndryo' ndlyen' lezo' gu' par li gu'i. Tac ryethe con'a nac con' co' ndli thib part ndoo lezo' mèn li mèn con' ndac. No tedib part ndoo lezo' mèn par li mèn con' ye'rsin'. Con'a nac xal thib xó' co' ndli con' ye'rsin' loo xpïi mèn no loo alm mèn. ¹²Nabe'ste fque tee ban ndac gu' làth mèn co' tarte libe' Diox no co' tarte ta' cuent cón che'n Diox. Tataa mod, mastale' nalle' ñii yèe ñii tii mèna cón che'n gu' axta mbez mèn nac gu' mèn ye'rsin'túb, per yiloo mèna hui' xal nac con' ndac co' ndli gu'.

No tataa mod mèna gab quetal naroo xèn nac Diox co' mbli nzi tee ban ndac gu' nalle'. Tataa gab mèna co'se' gac huiz co'se' ta' mèn cuent loo Diox cón che'npe' mèn.

¹³No por cón che'n Tad Crist, ftub nza gu' no ftubdi's gu' con' co' ñibe' ley co' mxo'f gobiern loo mèn, que naca con' co' ñibe' thib president por nac president thib xa' co' más ñibe', ¹⁴que naca con' co' ñibe' mèn co' nac gobernador co' nac mèn co' mtel' thib president par tetii mèn co' nac gobernador mèn co' ndli con' ye'rsin' no par li mèn co' nac gobernador con' co' nac con' guryath no con' guryèn loo mèn co' ndli con' ndac. ¹⁵Tac Diox, ne, ndlya's le' gu' thidteneque' li con' ndac par tataa mod li gu' par yau' ro mèn naxèn no ro mèn tont par ne'tolode tyoodi's mèna cón che'n gu'.

¹⁶Fque tee ban ndac gu' làth chol mèn xal mèn co' yende chó mbee nca' par li gu' chol con' ye'rsin' co' nac cón che'n xab izlyo'. Per mastale' ndli gu' cuent yende chó mbee nca' gu' par li gu' con' ye'rsin' por nzo gu' loo cón che'n Diox, ne'lìde gu' xtùuz por nzo gu' loo cón che'n Diox nzoque' mod li gu' chol con' ye'rsin'. Yende xàa, ey. Más huen fque tee ban gu' xalque' mèn co', lìcque', nac mèn co' nxo'f zin' zin' che'n Diox. ¹⁷Gòp gu' mod co' nac thib mod ndac loo rye mèn xal ndxàalpe' li gu'i. Fque' lezo' gu' gunèe gu' mèn co' nac hues xtàa gu' por cón che'n Jesucrist. Bzeb gu' loo Diox no bli gu' con' guryath no con' guryèn loo Diox. Gòp gu' mod loo mèn co' nac gobiern co' ñibe' loo gu'.

**Trè' ndlu' xá mod mxactii Crist
par tataa mod té'th mèn xá
mod ndxàal que tee ban mèn.**

¹⁸Nalle' gu' co' nac moz, ftubdi's gu' no gòp gu' mod gunèe gu' mèn co' nac patrón gu'. Iante tyubdi's gu' no gáp gu' mod loo mèn co' nac patrón ndac no co'

nac patrón nado'. Ndxé'leque', ftubdi's gu' no gòp gu' mod loo mèn co' nac patrón nayi', ne. ¹⁹Co'se' nxec yèe gu' no co'se' ncha'la's gu' co'se' ndxecloo patrón gu' loo gu' por thìb con' co' indxàalte li patrón gu' loo gu' no nxec gu' tac gu' nda'que' cuent no non gu' tataa ndlya's Diox li gu' loo patrón gu', ndxòo lezo' Diox con' ndli gu'a no nac con' co' ndli gu'a thìb con' ndac loo Diox chele' gu' tataa ndli. ²⁰Per chele' gu' li ndxep con' ye'rsin' co' ilé'de nac, no cona'te ndli tetii patrón gu, ¿ché' ndyac gu' naca thìb con' roo loo Diox chele' gu' nquin xec yèe chele' patrón tetii gu' por con' mbli gu' co' ilé'de nac, cà'? Yende xàa. Per ndxe'leque', chele' patrón gu' ndxecloo loo gu' por ndxep con' ndac co' mbli gu' no ncha'la's gu' no nxec yèe gu' par nabe'ste ngue li gu' zin' loo patrón gu', con'a nac con' ndac loo Diox no con' co' ndxòo lezo' Diox. ²¹Por mxec yèe gu' no por ngòp gu' mod, Diox mcui gu' no mdoo Diox gu' no mblec Diox gu' loo cón che'n Diox. Más de cona, gu' nonque' no nda'que' gu' cuent por cona mxactii Crist por cón che'n gu' par tataa mod mbli' Crist loo gu' xá mod ndxàal que tee ban gu' xal mque tee ban Crist loo izlyo' ndxè'. ²²Co'se' mque tee Crist loo izlyo' ndxè' nec thìb mod no nec tedib mod ne'ncua'nte Crist xquin Crist no xtol Crist no ne' ne' nquedii Crist nec thìb mèn. ²³Co'se' gunii yèe gunii tii mèn cón che'n Crist, ne'ncàbte Crist nec thìb di's, co' nee di's, ngàc nayi' Crist. Co'se' asempli mèn mtetii mèn Crist, ne'ngabte Crist sere Crist ya' Crist par ntin Crist mèn yiloo. Ndxé'leque', mtan' Crist ryethe con' mbli no mèn Crist part che'n Diox par li Diox co' nee lezo' Diox loo mèn, Diox co' nali no nambii ndub rez no ngo xtàa cón che'n con' co' ndli mèn loo xtàa mèn. ²⁴Yub Crist mxactii no mden' Crist yalnè lad Crist por cón che'n xtol mèn co'se' mque' mèn Crist

loo cruz. Tataa mod ngòca loo Crist par gac na' mèn co' thidtene yathla's no ryo' yéc na' no ryo' lezo' na' loo ryethe con' co' nac xtol na' no leque tiempa que tee ban ndac na' co' nac thìb yalnaban nali no thìb yalnaban nambii loo Diox. Crist mxactii ryethe con'a par gaca loo gu' ne'tyactiide gu' por cón che'n xquin gu' no por cón che'n xtol gu'. ²⁵Gu' nda'que' cuent no nonque' gu' le' gu' mque tee huan loo Diox póla loo ryethe con' co' nac xtol gu' xal thìb partid mbacxil' co' mdyuhuan. Per nalle', gu' ngòo loo cón che'n Crist, Crist co' nquenap gu' xal nquenap thìb pastor mbacxil'. No nquenap Crist alm gu' no xpui gu'.

**Trè' ndlu' xá mod ndxàal cue
ban mèn, mèn co' mselya'.**

3 Gu' ne, mèngot co' ngue no xin' sa'l, ftubdi's gu' di's co' ñee xin' sa'l gu' loo gu' no co' ñibe' xin' sa'lpe' gu' loo gu' no con' ndlya's xin' sa'l gu' li gu'. Tataa mod chele' ndxep xin' sa'lpe' gu' tarte yila's xal ndlu' di's ndac, nzoque' mod yila's xin' sa'l gu' no li la's xin' sa'l gu' licque' nac cón che'n Tad Jesucrist por ngüii' xin' sa'l gu' mod co' nque tee ban no gu' xin' sa'l gu'. Tataa mod inquinte tyoodi's no gu' xin' sa'l gu' cón che'n di's ndac no cón che'n Jesucrist. ²Le' sya, tataa mod li la's no yila's xin' sa'lpe' gu' loo cón che'n Jesucrist co'se' hui' xin' sa'lpe' gu' loo mod co' nac thìb mod ndacpe' co' ndxàp gu' loo xin' sa'lpe' gu'. ³Lomisque' ne, gu' co' nac mèngot, indlyasten le' gu' arid tyoxcua' gu' par nabe'ste ñaa gu' no par nít nayèe ñaa gu' co'se' ndxoc xab gu'. Angab na'i, co'se' ante nít nayèe ñaa yéc gu' ndee gu' bèu yéc gu' no co'se' ndxòo corral or yen gu' no nque yi'f or nza gu' co' arid ntac no co'se' ndxoc xab gu' lar' co' anze'f nabe's ñaa no co' arid náp ntaca. ⁴Ndxé'leque', ndlyazen lu' gu'

mod ndac co', licpe', ndxàp gu' le'n lezo' gu' no le'n xtùuz gu'. Moda ne'lyuxte loo mèn. Thidtene ndxòo lezo' mèn moda. Thidteneque' nazi' nziri' mèn con xtàa mèn. No nagàl nziri' mèn no rye nda rye ndye'th nziri' mèn làth xtàa mèn. Con' co' ndli gu'a no mod co' cue ban gu'a anze'f ntac loo Diox, ey.

⁵Póla, tataa mdyoxcua' mèngot, mèngot co', licque', ngro xà' loo ryethe con' ye'rsin' co' nac cón che'n xab izlyo' no co' ngòc che'npe' Diox. Ngòp mèngota yalxla's loo Diox no mdubdi's mèngota di's co' mnibe' xin' sa'l mèngota loo mèngota no mdub nza mèngota loo con' gunee xin' sa'l mèngota loo mèngota.

⁶Tataa mbli Sar, ne. Mdubdi's Sar loo Abraham. Gu', ne, gac xal ngòc Sar chele' gu' toloque li con' ndac no chele' gu' ne'tolode zyeb loo nec thib con'.

⁷Gu', ne, mènbi' co' nac xin' sa'l mèngot gu', gòc gu' mèn co' huen huen mté'th xá mod ban no gu' xa'got gu' no xá mod quenap gu' xa'got gu'. Bli gu' con' guryath no con' guryèn co' ndxàal li gu' loo xa'got gu'. Iante por nac mèngot mèn delicad li gu' con'a. Ndxé'leque', bli gu' con' guryath no con' guryèn loo mèngot co' nac xin' sa'l gu' tac mèngota, ne, ngue no leque yalnaban co' mda' Diox loo mèngota xalque' nac yalnaban co' mda' Diox ngue no gu' nalle'. Tataaque' bli gu' loo mèngotpe' gu' par de que yende cón nca' no yende cón nca' loo gu' par thidte cuez no gu' xa'got gu' Diox.

Trè' ndlu' cón che'n mèn co' ndyactii ante por mbli mèn con' ndac.

⁸Por lult, ndlyazen thidte cue ban gu'. Thidte gac xtùuz gu' no thidte gac lezo' gu'. No thidte lyat lezo' gu' ñèe gu' thib xtàa gu' no tedib xtàa gu'. Ndlyazen que' lezo' gu' ñèe gu' hues xtàa gu' por cón che'n Jesucrist xalque' mèn co' ndxàc hues. Gòc gu' mèn co' ndyac no xtàa. Gòc gu' mèn co' indlu'de

ndye's. ⁹Ne'co xtàade gu' loo nec thib mèn leque con' ye'rsin' co' ndli mèn loo gu'. Ne' ne' li gu' par ta' gu' xyàn lezo' mèn xal nda' mèn xyàn lezo' gu'. Ndxé'leque', más huen bli gu' con' ndac loo mèn co' mbli con' ye'rsin' loo gu. Tac Diox ngurez gu' no mblec Diox gu' par angli Diox con' ndac loo gu'. ¹⁰Tac loo libr co' nac xti's Diox ndub di's co' mbez:

Le' mèn co' lya's ban nen tiemp no co' lya's gac con' ndac loo loo izlyo', ndxàal gáp lezo' mèn par ne'tyoodi'ste mèn chol di's ye'rsin'. Ne' ne' gac mèn mèn gutyè'.

¹¹Ne'ta'de gu' lugar tyoo nii gu' no tyoo ya' gu' xal ndli mèn co' ndli con' ye'rsin'. Ndxé'leque', bli gu' con' ndac loo hues xtàa gu'. Ftui ftàl gu' co' nac xèn xyàn co' ndxàc loo gu'. Bli gu' co' nzote mod li gu' par yo nagàl lezo' gu' no gure ban gu' rye nda gu' no rye ndye'th gu' làth xtàa gu'. ¹²Tac Tad Diox nquenap no indlá'ya'de Tad Diox mèn co' nac mèn nalì no mèn nambìi. No ndxòn Tad Diox ro mèn co'se' mbez mèn Diox par li Diox con' co' ña'b mèn. Par ndxé'leque', Diox thidtene ingüi'de loo mèn co' ndli con' ye'rsin'. No ndxezan Diox ndxegaa mèn loo con' ye'rsin' co' ndli mèn.

¹³Chó mèn li con' ye'rsin' loo gu' chele' gu' thidteneque' mbli nèe gu' par li gu' con' ndac, à'? Yende chò mèn gac li con' ye'rsin' loo gu' tataa, ìlé'? ¹⁴Per mastale' ndxàc yaltii loo gu' por nzi tee ban lì gu' no por nzi tee ban ndac gu', huen ndxàca loo gu' no huen nda gu' loo cón che'n Diox. Ne'zyebte gu' loo nec thib con'. No ne' ne' ya ye'th lezo' gu' nec thib mod no nec tedib mod par tyoo xà' lezo' gu' loo cón che'n Crist. ¹⁵Ndxé'leque', bli gu' par gac con' guryath no con' guryèn loo Crist xalque' Tad gu' le'n xtùuz gu' no le'n lezo' gu'. No bli gu' cas loo Crist. Nalas gure

gu' par gác gu' càb gu' loo chol mèn, mèn co' ña'b thibb razon o thibb consej loo gu' co' nac cón che'n co' ndxela's gu' loo Diox no co' nzi quee lezo' gu' loo Diox. Bli gu'i xal mèn co' indye'ste. Nado' di's no nado' cuent bli gu' cas loo mèn no gòp gu' mod loo mèn co'se' ña'b mèn loo gu' par tyoodi's no gu' mèn. ¹⁶Nabe'ste fque tee ban ndac gu' no nabe'ste fque tee ban li gu' par ne'ten'te gu' le'n lezo' gu' le' gu' ngue li con' ye'rsin'. Le' sya, mèn co' nazab ndyoodi's cón che'n xá mod nque tee ban gu' mastale' nabe'ste nque tee ban ndac gu' xal mèn co' ndxela's loo Crist, ndxe'leque', mèn ten' le'n lezo' mèn na thyon mèn cón che'n xti'spe' mèn co'se' ndyoodi's mèn cón che'n gu'. ¹⁷Más huen gác yaltii loo mèn por ndli mèn con' ndac, chele' Diox ndlya's tataa gaca loo mèn, leque gác yaltii loo mèn por ndli mèn con' ye'rsin'. ¹⁸Tac yub Crist mden' yalnè no mxactii Crist axta nguth Crist por cón che'n xquin na' no xtol na'. Thidte vez ngòca loo Crist por cón che'n xquin no xtol che'n ryete mèn. Crist ngòc thibb mbi' ndac. Per ndxe'leque', le'le' Crist mxactii por na', na' co' nac mèn ye'rsin', par tataa mod yòo na' loo cón che'n Diox por cón che'n Crist. Bèl'yòo lad Crist nguth per xpii Crist no alm Crist ne'ngathte. Ndx'e'leque', nzo ban Crist por cón che'n con' roo con' xèn co' nzo la's nii no co' nzo la's ya' Xpii Natú' che'n Diox. ¹⁹Láth nzo ga's bé'l'yòo lad Crist co' ngòc thebol le'n ye'r quèe co' ngòc bá' co'te' mca's mèn Crist le'n izlyo', ngua lu' xpii Crist no alm Crist loo taamas alm no taamas xpii co' nzo gòo le'n thibb lugar co' ngòc xal thibb lezi'f le' Crist na, mbli gan loo con' ye'rsin' co' nac cón che'n Mebizya. ²⁰Almaa no xpiia ne'ndubdi'ste loo Diox co'se' ngòc tiemp pólle'a pólle'a le'n huiz no le'n tiemp co'se' mque tee ban thibb mbi' co' ngro' lèe Noé. Le'n tiempa Diox

mdub bed no mcha'la's Diox con mènna láth mdyoxcua' yòoyaa co' mtocxua' Noé. Le'n yòoyaaa nagabte mèn ngòc co' ngòo le'n yòoyaaa, co' nee di's, xon mèn. Mènna ngòc mèn co' mblyá' loo nít no loo yuuloo co' ngulaa tiempa. ²¹Nít che'n yuuloo co' ngure loo izlyo' tiempa ndlu' loo na' no nda' cuent loo na' cón che'n bautism co' ngòc loo na'. No por cón che'n bautisma nanee na' le' na' mblyá'le' loo con' ryes nalle'. Per bautism co' ngòc loo na' inacte bautisma par gab na' mtembii bautism lad na' no maste. Ndx'e'leque', naca le' por cón che'n bautism co' ngòc loo na' mna'b na' loo Diox li Diox par ne'tolode ten' na' le'n lezo' na' cón che'n xquin na' no xtol na' co' mton' Diox loo na'. Más de cona, bautism co' ngòc loo na' ndlu' loo na' mblyá' na' loo con' ryes por cón che'n co'se' ngro xban Jesucrist làth mèn nguth. ²²Ngolaa, nguáp Jesucrist loo bé'. Ndub Jesucrist cuat Diox loo bé'. No ryete angl, no ryete xa' co' ñibe', no ryete xa' co' ndxáp con' la's nii no la's ya', ryete xa'a mde's nii no mde's ya' loo Jesucrist par ñibe' Jesucrist loo ryethe con'.

Trè' ndlu' xá mod ndxàal li mèn sirv thibb mod no tedib mod co' gác mèn loo Diox.

4 Cona, ngue niin loo gu': Texal mxactii Crist no mden' Crist yalnè lad Crist, gu', ne, ndxàal cuec lezo' par tyactii gu' chele'i nquin gac loo gu'. Gu' nda'que' cuent le' chol mèn co' mxactiile' lad por cón che'n Crist, mènna ndlu', licque', ya intolode cua'n mènna xquin mènna no xtol mènna loo Diox. ²Tataa mbli mènna par ban mènna taandxep tiemp loo izlyo' ndxè' ante xal nee lezo' Diox. No làtha, ya ne'tyubte yo'f lezo' mèn loo ryethe con' co' ndxuhua nèe lezo' mèn co' nac cón che'n xab izlyo' ndxè'. ³Ya mbyaale' mda' gu' gust lezo' gu' loo huax con'

co'se' tarte yila's gu' loo Diox tiemp co' ngòc póla xal ndli mèn co' indlibe'de Diox. Tiempa, gu' mque tee ban loo chol con' ye'rsin' co' mdub yo'f lezo' gu' par li gu'. Angab na'i, ngòc gu' mènguy. Mque tee yuhua xle' gu' co'se' ndli gu' chol Ini. Mque tee yu xle' gu' che'n mèn hor co' ndly'a's gu' axta plóthe. Ayen yii ayen den ndxèn mbez yèe gu'. Mque tee tuuz gu' axta plóthe, ne. Mbli gu' chol Ini loo chol mdo' no loo chol gunab co' ndxab Diox indxàalte còo' mèn yéc mèn loo no indxàalte tyub xib mèn loo. ⁴Nalle' mènà mbez loo xtàa mèn no loo lezo' mèn chonon inqueitàade gu' con mènà loo ryethe con' ye'rsin' co' ndub yo'f lezo' mènà loo mod co' nque tee ban mènà. No por cona, nazab ñii yèe ñii tii mènà no mbez mènà ngòc nguàal con' cón che'n gu'. ⁵Per prob mènà naquinque' ta' cuent loo xa' co' ngòc nable' par tub rez xa' cón che'n mèn loo mèn co' be' naban no loo mèn co' nguthle'. ⁶Por cona, ngue niin loo gu': Loo mèn co' nguthle' nalle', mblo mèn yalbàn no mde'th mèn cón che'n xá mod lýá' mèn loo con' ryes láth be' ngure ban mènà par gac loo mènà co'se' gath bél'yòo lad mènà, yòo ban no xpìi mènà no alm mènà Diox xalque' naban Diox. Tataa ngòca loo mènà mastale' yub Diox gunee lezo' cón che'n mènà nquin gath bél'yòo lad mènà xalque' ndxath rye mèn.

⁷Nase ya nde zin' gaxle' tiemp co'se' tlo lyux tiemp ye'rsin' co' naban na' loo izlyo' ndxè'. Cona, ngue niin loo gu': Ndx'e'sleque' fque tee ban gu' no nalas fque tee ban gu' loo izlyo' ndxè'. No ne'yathla'ste gu' par tolo cuez gu' Diox ze no yál'. ⁸Más de cona, loo ryethe con' co' ngue niin loo gu' ndxè', ndlyazen que' lezo' gu' gunèe gu' hues xtàa gu' axta plóthe. Tac mèn co', licque', nque' lezo' ñèe hues xtàa mèn axta plóthe, mènà ingòode xyàn lezo' ñèe mènà hues xtàa mènà arid. Luega nteri'th

ntecan' mènà xyen xyàn co' ndxòo lezo' mèn ñèe mèn hues xtàa mèn. ⁹Fta' gu' liz gu' cued mèn co' ña'b loo gu' par cued mèn liz gu'. Per ne'cuez nguixte gu'i loo mèn por mda' gu' liz gu' nguled mèn. ¹⁰Lomisque' ne, li thib thib gu' sirv loo chol xtàa gu' par lyath no gu' xtàa gu' xal nzote mod co' nac co' mda' Diox lugar gac gu' li gu' sirv loo mèn. Tataa bli gu' xal mèn co' nxo'f zin' ndac co' nac thib zin' co' angmbli Diox loo gu' par li gu' sirv loo mèn. ¹¹Mèn co' mda' Diox lugar gac mènà par tyoodi's no mènà mèn cón che'n Diox, tyoodi's no mènà mèn xalque' ndyoodi's no Diox mèn. No chele' chol gu' lya's ta' thib huiz zin' anxle' loo xtàa gu', ne'cua'nte gu' mod guth gu' má' xi'tha. Bli gu' zin'a xal ndxàal li gu' zin' xal mda' Diox fuerz loo gu' par li gu'i. Bli gu' le' ryete con' co' li gu'a càba gab mèn con' roo no con' xèn cón che'n Diox no gab mèn natú' nac Diox, ne, por cón che'n Jesucrist. Ndlyazen gac con' roo no con' xèn loo Jesucrist no ndlyazen yan' ryethe con' roo no ryethe con' xèn la's nii Jesucrist no la's ya' Jesucrist ne'le'n lín' co' nle'n lín' co' ndxelo, no le'n lín' co' ne'lith node. Taandxè' gaca.

Trè' ndlu' xal ndxàal que tee ban mèn co'se' ndxàc yaltii loo mèn, mèn co' ndxela's loo cón che'n Diox.

¹²Mèn huesen por cón che'n Crist, gu' co' anze'f nque' lezon ñèen, ne'gàcte gu' mèn co' arid ne'ñeede cón, chàa, gac loo gu' co'se' ndxàc chol yaltii tín' loo gu'. Ne'ten'te gu' le'n lezo' gu' con' co' ndxàc loo gu' nac thib con' co' tarte ñèe mèn gac loo izlyo' ndxè'. ¹³Ndx'e'leque', ftac lezo' gu' co'se' gaca loo gu' le' gu' tyactii no Crist ndxep par gaca loo gu' tyac tín' lezo' gu' co'se' ñèe gu' gac con' roo no con' xèn loo Crist co'se' yi'th Crist loo izlyo' ndxè' tedib vez. ¹⁴Chele' mèn ñii ngòc nguàal con' loo gu' por cón che'n Crist, huen

gàca loo gu' no huen nda gu' loo cón che'n Crist. Co'se' gàca tataa loo gu', ñee gu' no ta' gu' cuent le' Xpii che'n Diox, Xpii co' nac Xpii roo no Xpii xèn, nzo loo gu'. Mèna ñii yèe ñii tii cón che'n Crist. Per ndxe'leque', gu' ndli ndxàc con' guryath no con' guryèn loo Crist. ¹⁵Thìb descuid nquin tyactii gu' ndxep. Chele' gu' nquin tyactii ndxep, bla's gu' no huen huen quenap gu' gu' par ne'tyactiide gu' por mbeth gu' mèn; por mbli huan' gu'; o por mbli gu' con' ye'rsin'; o por mbla's ro' gu' di's cón che'n tedib mèn co' inacte cón che'n gu'. ¹⁶Ndxè'leque', chele' chol gu' ndyactii ndxep ante por nzo gu' loo cón che'n Crist no maste, inquinte thyon gu'. Ndxè'leque', ndxàal gab gu' le' Diox nac Diox roo no Diox xèn por mda' Diox lugar loo gu' ne' gu' lèe mèn co' nac che'n Crist por nac gu' mèn co' nzo loo cón che'n Crist.

¹⁷Nase mzinle' huiz no mzinle' tiemp co'se' tlo tub rez Diox cón che'n con' co' ndli mèn co' nac mèn guliz Diox, co' nee di's, na' co' ndxela's loo Diox por cón che'n Jesucrist. Chele' Diox ya tataale' mtlo ngue tub rez cón che'n na' par tetii Diox na', ¿xá nee gu'? ale'que' ne' gac más con' ye'rsin' tín' loo mèn co', por derech, ne'ndubdi'ste loo di's ndac che'n Diox co' ndlu' xá mod ndlyá' mèn loo con' ryes, ¿lé'? ¹⁸Lomisque' ne, chele' mèn co' nac mèn ndac no mèn nali loo Diox añenti mdyal par ngulàa yéc mèn no ngulàa lezo' mèn par mblyá' mèna loo con' ryes, ale'que' loo mèn ye'rsin' co' ndxàp xtol, pà yila's mèn lyá' mèna loo con' ryes, ¿lé'? Yende xàa. ¹⁹Por cona, ngue niin loo gu': Mèn co' ndxela's loo Diox no co' ndyactii xal nac co' guneé lezo' Diox, mèna ndxàalque' tolo li con' ndac loo hues xtàa mèna. No ndxàalque' toloque' na'b mèna quenap Diox alm mèna no xpii mèna la's ya' Diox no leque tiempa gáp mèna yalxla's loo Diox le' Diox lii

loo mèna. Yub Diox nac Diox co' mbli par nzo na'. No yub Diox ndlique' co' mcàbgòn Diox li Diox loo mèn.

Pedr ngue co'x loo mèn co' ndxela's loo Diox.

5 Daa, Pedr nac thìb xa' gox nalle' co' lalque' ngxox xal ngxox ndxep mèngool co' nzo làth gu' co' nqueltàa no gu'. Gunèen co'se' mxactii Crist. No ndan cuent cón che'na loo mèn no ndlu'en loo mèn xá mod mxactii Crist. Thidte gac con' roo no con' xèn loo ryete na', yiloo. Por cona, ngue co'xen loo mèngoola nalle'. ²Ndlyazen le' mèngoola quenap mèn co' ngòo loo cón che'n Diox co'te' nqueltàa gu' par nedrè', mèn, co' nee di's, nac xal mbacxil'pe' Diox. Ndlyazen li mèngoola con' co' ngue co'xen loo mèngoola loo di's ndxè' dib nzo yéc mèngoola no dib nzo lezo' mèngoola xal mèn co' huen nzo lezo' xal neete lezo' Diox. Indlyasten a la fuerz li mèngool con' co' ngue co'xen loo mèngool ndxè'. Ne' ne' indlyazen li mèngoola xal mèn co' ante nde yath ñèe tmi. ³Ne' ne' indlyazen xo'f zin' gu' zin' ndxè', mèngool, xal mèn co' ndxàc che'n thìb con' no xal mèn co' ñibe' loo xtàa mèn, loo mèn co' ndyoo ner gu' loo no mèn co' ndyoo naa gu' loo. Ndxè'leque', cua'n gu' mod blu' gu' gu' loo mèn co' nac xal mbacxil' le' gu', licque', nque tee ban ndac no nque tee ban li gu' loo cón che'n Diox. ⁴Tataa lyazen li gu'. Le' sya, co'se' yú'loo Tad Jesucrist co' nac merpe' pastor co' ndyoo ner no co' ndyoo naa loo mèn co' nzo loo cón che'n Diox, xal nquenap thìb pastor mbacxil', huiza gu' gac che'n no yan' no gu' thìb con' roo no thìb con' xèn co' inacte xal thìb coron co' natoxcua' con laa nayèe co' lueg ngol'.

⁵Lomisque' lyazen ne, gu' co' nac myen'bi' no gu' co' nac myen'got, ftubdi's gu' loo con' ñibe' mèngool loo

gu'. Lomisque', ndlyazen le' ryete gu' gac nado' loo thib gu' no loo tedib gu' no gòc gu' mèn co' ncu'a'n mod gac con' ndac loo hues xtàa gu' por cón che'n gu'. No ne'gàcte gu' mèn nayi'.

Tac Diox ndxecloo no ndxàc Diox ngolo ngola's loo mèn co' ndye's no loo mèn co' nxyal'. Per ndxe'leque', Diox ndlyath no mèn nado' co' indye'ste no mèn co' inxyal'te loo ryethe con' ndac cón che'n Diox.

⁶Cona, ngue niin loo gu': Gòc gu' mèn nado' loo ryethe mod co' ndxàp gu' tac Diox ndxàp rye loothe con' la's nii Diox no la's ya' Diox. Chele' gu' tataa li, le' sya, Diox li par gac gu' mèn roo mèn xèn co'se' gacpe' huiz co' nanee Diox ndxàal gac gu' mèn roo mèn xèn. ⁷Yende chó mport nzo lezo' Diox por ndxath ndlyux gu' loo cón che'n gu'. Más huen gurez gu' Diox por cón che'n ryethe con' co' nde che loo gu' no con' co' nden' gu' no con' co' ndli nxi lezo' gu'. Tac ndxe'leque', le'le' loo Diox ndxàca thib zin' cón che'n gu'.

⁸Lomisque', ndlyazen gòc gu' mèn nalas no mèn lijer xal mèn co' nquenap liz thib mèn co' ndxàp che'n. Tac Mebizya co' nac ngolo ngola's che'n gu' ngue tee cua'n mod par telux Mebizya gu' xal thib mbee's co' mbez yèe co'se' ngue tee lan' mbee's, ncu'a'n mbee's co' hua mbee's. ⁹Gòp lezo' gu' par nec thib mod no nec tedib mod ne'lide gu' nec thib con' co' nee lezo' Mebizya li gu'. Más huen bli nèe gu' gu' loo cón che'n Crist co' ndxela's gu'. Tac gu' naneeque' no nda'que' gu' cuent le' ryete mèn co' ndxàc hues gu' por cón che'n Crist co' nzo dib athu loo izlyo' nzi tac leque yaltii co' ndyac gu' par nedrè'. ¹⁰Per co'se' riid yaltii loo gu' co' ndxàc ndxep tiemp loo gu', Diox li par gac gu' mèn co', licque', mtéth no mèn co' nda'que' cuent no mèn co'

ndyubdi'sque' loo cón che'n Diox. No Diox li par leque gu' li nèe gu' loo cón che'n Crist. No li Diox par ne'tolode gac gu' mèn co' nac chop loo chop la's loo cón che'n Diox. Leque yub Diox angndli ndxàc rye loothe con' ndac loo na'. No leque yub Diox nac Diox co' ngurez na' no mblec Diox na' par gac che'n na' no par yan' no na' rye loothe co' nac con' roo con' xèn che'npe' Diox tac thidte ndxàc na' con Crist no ngòo na' loo cón che'n Crist thidtene. ¹¹Ndlyazen tolo gac con' roo no con' xèn loo Crist no ndlyazen yan' ryethe con' roo no ryethe con' xèn la's nii Jesucrist no la's ya' Jesucrist le'n lín' co' ntlo, no le'n lín' co' ndxelo, no le'n lín' co' ne'lith node. Taandxè' gaca.

Con' ndxè' nac lult di's co' mque' Pedr ye's loo mèn.

¹²Mtel'en cart ndxè' loo gu' con Silvan co' ndlin cuent nac thib hues na' co' altant ndoo loo cón che'n Crist. Loo cart ndxè' mco'xen loo gu' no mblin le' gu' nda' cuent co' huenleque' le' ryethe yalndac co' angndli Diox loo gu' ndlu' loo gu' le' Diox, licque', nque' lezo' nèe Diox gu'. Por cona, ftolo gure nèe gu' loo cón che'n Diox. ¹³Mèn co' nqueltàa loo cón che'n Diox yèez Babiloñ, mèn co' Diox mcui xalque' mcui Diox gu', mèna ngue nii Diox loo gu' loo cart ndxè'. Ngue nii Marc, co' nac xal xgan' daa, Diox loo gu', ne. ¹⁴Co'se' ngue nii gu' Diox loo hues xtàa gu' loo cón che'n Crist, fxen gu' ya' xtàa gu' xalque' nac mod co' ndxàp gu', gu' co' nqueltàa loo cón che'n Diox.

No ndlyazen yo nagàl lezo' ryete gu' loo Diox no cue ban gu' rye nda gu' no rye ndye'th gu' con xtàa gu', gu' co' nac che'npe' Jesucrist. Taandxè' gaca loo gu', ndee gu'.